

Inventari da tuot quai chi's chatta

Di da la diversità da las spezchas GEO a Tschlin

■ (anr/fa) Al di dal magazin tudais-ch GEO registrescha üna tschinquantina da scenziats durant 24 uras tuot la diversità da las creatüras in ün territori defini. L'intent es da sensibilisar pella valur da la natura intacta. Cur cha dunzainas da scenziats piglian suot ögl la natura, cun bloc pellas notizchas, marella e per part sün tuots quatter, esa darcheu il Di da la diversità da las spezchas GEO. Da l'on 2014 es quel di gnü realisà tanter Ardez e Lavin e l'on passà in Val Müstair. Ingon as chattan las expertas e l'experts darcheu in Engiadina Bassa. Insonda, ils 25 da gün piglian var 50 persunas da la scienza suot ögl ils contuorns da Tschlin.

Cun trais excursiuns tematicas

Las scenziadas e l's scenziats tschercharan p. ex. müs-chels, lichens, bulais, reptils, plantas cun flur, orchideas, utschels, muos-chas, splers e mamifers pitschens. Indigens e giasts survegnan quel di l'ocasiun da verer co cha l's experts lavuran e forsà eir da discorrer cun els. Implü vegnan sportas quella sonda eir trais excursiuns: Ils temas da quella sun «a», «reptils» ed «utschels chi cuan per terra». La davomezdi vers saira ha lura lö l'arrandschamaint final dal di suot l'insaina da la diversità da las spezchas. In quell'ocasiun preschantaran ils perscrutaders prüms resultats da lur lavur da quel di. Pro la marena cun prodots da «Bun Tschlin» faran ils scenziats lura impringias culs preschaints e discutaran cun els lur lavur a Tschlin.

Adüna darcheu eir cun novas scuvertas

Daspö l'on 1999 organischa il magazin GEO minch'on il Di da la diversità da las



A chaschun da las excursiuns pon ils interessats observar il möd da lavurar dals perits.

FOTO N. MEYER

spezchas. In ün territori defini ouravain fat ün inventari da tuot la flora e fauna chi's chatta là. Daspö trais ons s'ingascha la Fundaziun Pro Terra Engiadina per possibilitar als respunsabels dal GEO da far quists dis i territori da la region da vacanzas Scuol Samignun e Val Müstair. In ocasiun dals dis dedicats a la diversità da las spezchas han ils scenziats fat fingià plüssas scuvertas: Dal 2014 ha la sesantina d'experts dombrà in Engia-

dina Bassa 220 differentas spezchas da lichens, tanter quella 70 na amo cunschaintas. Tanter las 160 chürallas da la saira s'haja registrà quatter sorts chi nu d'iran amo gnüdas vissas in Engiadina Bassa. I l's contuorns da Tschier vaivan scuvert ils perits l'on passà ün scarafag chi nu's chatta uschigliö sün quell'otezza sur mar. Ils experts han observà 73 differentas spezchas d'utschels, tanter quels il girun barbet, l'aglia, il sprer da giallans, il

volvacheu e la quaglia. Implü han ils partecipiants dal di organisà dal GEO eir chatta amo vaich da quaranta sorts dad orchideas chi dà in Engiadina Bassa. Ils resultats da las retscherchas a chaschun dal Di da la diversità da las spezchas gnaran eir quist on publicats plü tard i'l magazin GEO.

Il program detaglià dal di a Tschlin as chatta i'l internet sün www.scuol.ch/geotag

Festa dals sculptuors a Sur En da Sent

Tschaina e star da cumpagnia cun trategnimaint musical

DA BENEDICT STECHER / ANR

■ Il 22avel Simposi internaziunal da sculpturas a Sur En ha lunga tradiziun ed es dvant ün eveniment important chi attira blera glieud. Tradiziunala es eir la sairada, a la quala artists, giasts ed indigens as chattan per discutar e's tratgnair. Las trais artistas ed ils 15 artists dad üneshch pajais, tanter els ses artists svizzers, chi han lavurà ün'eivna sün l'areal dal camping a Sur En da Sent s'han chattats in sonda passada per gioidair üna saira cumünai. Ils iniziants da quist arrandschamaint sun *Wolfgang Bosshard* e l'artist da Guarda *Jean Badel*. Pel simposium da quist on vaivan els survgni bundant 70 annunzhas, ha tradi Bosshard chi maina la gestiun da L'Art Engiadina. Our da quel ravuogl han els lura schelt 18 artistas ed artists chi han tut part al 22avel simposi. Sper ils partecipiants sviz-

zers d'eiran da la partida eir partecipiants da l'Austria, Germania, Iran, Giapun, Russia e da l'Ucraina. Ün battibuogl da culturas, linguas ed ideas. Però pro l'art s'han tuots chattats in lur möd. L'eivna da cultura ha eir gnü lö in otras regiuns, uschè per exaimpel a Tavo. Dürant l'eivna da sculpturas vain sporta eir la pussibilità da far visitas ad artists indigens a Sent, a Ftan ed a Guarda, da visitar il parc da sculpturas da *Nor Vital* a Sent, la collezziun privata d'ouvas da *Giacometti* i'l Hotel Aldier eir a Sent e dal Center cultural Nais.

Star da cumpagnia e gioidair

La sonda passada es statta suot l'insaina star insemel e gioidair davo ün'eivna cun blera lavur. Las artistas e l's artists insemel cun giasts ed indigens han gioidü üna sairada pro'l camping a Sur En cun mangiar, baiver e star da cumpagnia.



Ils partecipiants sun gnüts maldütsats cun pulenta e rost.



Üna da bleras sculpturas dasper il plazal da festa.

FOTOS B. STECHER

Greiv'on per la TESSVM es i a fin

■ (anr/af) A la radunanza generala da la DMO Turissem Engiadina Scuol Samignun Val Müstair SA (TESSVM) han approvà ils acziunaris tuot las fatschendas stattas tractandadas. Sco cha la TESSVM ha comunicà serra il rendaquint da l'on 2015 cun ün deficit da 40'000 francs e quai pro ün schmertsch da 6,178 milliuns francs. Quist deficit pitschen es, tenor la destinaziun turistica, d'attribuir a contribuziuns extraordinarias dals acziunaris ed a las diversas masüras da respargn pro'l persunal ed il marketing. Ils respunsabels fan quint dad esser finanzialmaing per la fin da quist on darcheu sün buna via. La radunanza generala da lündeschdi saira ha fat bun il rendaquint, dat dis-charg al cussagl administrativ e la direziun es gnüda reeletta per ils prossems trais ons. Il president dal cussagl administrativ, *Theo Zegg* da Samignun, ha appellà in seis rapport annual d'as concentrar in temps greivs sün quella fermezza chi han il plü bler potenzial. Ils acziunaris as sun conscients da las sfidas cha quist marchà maina cun sai. In avegnir vöglian els trar a nüz amo megler las pussibilitats da la DMO. Il directur *Urs Wohler* ha manzunà in seis pled la divergenza tanter la lavur dals turistadas e las aspettativas dal public. «Üna DMO nu po mai esser suletta respunsabla per il svilup general da la dumonda davart pernottaziuns. Quella ha be ün'influenza limitada illa strategia e las masüras dals differentes exponents», ha dit Wohler. Plünavant sun las pernottaziuns dependents dad uschè blers factors chi nu pussibiliteschon da güdichar la prestaziun d'üna DMO da quella. Il directur da la TESSVM vezza daper tuot là ingio cha l'organisaziun ha üna pussibilità d'agir s'vessa diversas pussibilitats ed ulteriurs potenzials. Tenor il model da pussibilitats da la DMO faja dabögn da chattar ulteriurs möds da collavuraziun e da trar a nüz ils avantags da la grondezza. In quist sector po la DMO dar a la destinaziun ulteriurs impuls e spordscher üna plüvalur a quels partenaris chi s'ingaschan activamaing.

trio /// arsis a San Niclà

■ Daspö l'on 2015 as preschainta il trio /// arsis in üna nouva fuormaziun: A las duos commembras fundaturas *Delaja Mösinger* (viola) e *Cristina Janett* (cello) as ha associada la violinista *Flurina Sarrott*. Cün la virtuosità solistica da Sarrott e l'unità da musica da chombra da las duos partenarias dal trio da fin quà resulta ün inscuntrar chi imprometta üna cultura da divers clings e manieras da sunar. La collavuraziun da fin quà da las trais duonnas giuvnas es gnüda fuormada tras la perinletta in il möd da legger las partituras e nu lascha ingüns dubis cha'l trio nun ha be bunas schanzas d'exister, dimpersè ch'el as svilupperà eir invant.

Concert: venerdì, 24-06-2016, 20.15, baselgia San Niclà. Strada; entrada 30 francs; reducciun pro commembranz; reservaziun giavischà.

Center cultural baselgia San Niclà

Lia Rumantscha cun nov domicil a Scuol

■ (cp) Sonda, ils 25-06-2016 inauguracha la Lia Rumantscha (LR) cun in aperto da bainvegni ses nov dachasa in l'Engiadina Bassa. Las localitads sa chattan in il medem bajetg sco la pastizzeria Cantieni a la Via Stradun 403A. A partir da las 14.00 prelegia l'autura *Rut Plouda* or da texts da differentes auturs ed i dat ina cruschera cun premis attractivs.

La squadra da la LR cun *Martina Shuler-Fluor*, *Flurina Plouda Lazzarini* e *Mario Pult* sa legran sin buns inscuters.